

西夏書事

西夏書事卷三十

青浦 吳廣成西齋 纂

紹聖三年

遼壽昌二年

夏天祐民安七年春二月以兵入

延州侵義合砦

梁氏以地界不定數肆憑陵哲宗用宰相章惇議
罷諸邊分畫令督衆乘勢進討梁氏憤發兵入綏
德界攻義合砦義合與保安軍德靖砦綿亘七百
里中間堡壘參差烽燧疎遠延州軍不能應大掠
而還

三月圍塞門砦

復遣數萬衆圍塞門大持攻具相持數日聞鄜延
經畧遣大兵至乃退

秋八月寇順寧砦敗還

涇原將張蘊伏兵隘中約戰急聞呼則起夏兵遂
敗被俘斬者數百人

九月遣右廂首領誘環慶官兵至雞鞞嶺與戰不勝
梁氏命右廂一帶首領遣使從間道至環慶路詐
言願舉族歸漢章奏遣將鍾傳折可適率兵援接

至雞鞞嶺夏兵卒起四圍合擊力戰不勝傳等全
師退

冬十月國主奉母將兵寇鄜延陷金明砦

乾順見連次擾邊不利奉母梁氏率衆號五十萬
入鄜延西自順寧招安東自黑水安定中自塞門
龍安以南二百里間烽火相繼不絕游兵直至延

州五里知州城有備自長城一日馳至金明列營

環城梁氏母子親督桴鼓城遂陷

宋史呂惠卿傳
知延州時聞夏

人將入寇預修米脂諸砦爲備夏兵至欲攻城則
城不可近欲剽掠則野無所得欲戰則諸將不爲

勦欲南侵則懼腹背受敵留二日守兵二千五百
卽拔柵去遂陷金明與夏國傳異人惟五人得脫城中糧五萬石草千萬束皆盡殺
皇城使張興臨行留書置漢人頸上曰貸汝命爲
我投經畧司書言夏國昨與朝廷議疆場惟小有
不同方行理究不意朝廷改悔卻與坐團鋪處立
界本國以恭順之故詎勉聽從于境內立數堡以
護耕而鄜延出兵悉行平蕩又數入界殺掠國人
其憤欲取鄜延終以恭順止取金明一砦以示兵
鋒亦不失臣子之節也延帥呂惠卿上之樞密院

不以聞

按前書梁氏自將惡梁氏也此書奉母將兵罪
乾順也

十一月獻金明俘于遼

中國自金明破哲宗命緣邊諸路相度要害增嚴
守備熙河將王文郁等築汝遮爲安西城以通秦
鳳援師梁氏懼中國聲討遣使獻俘遼國以爲應
援

十二月爭葭蘆城不克

夏兵據橫山並河爲砦四出寇掠秦晉之路皆塞
知太原孫覽謀取葭蘆戍扼其險阻梁氏遣兵數
萬屯境上覽下令吾兵少須滿五萬方西夏兵聞
而備懈一日猝爲覽所乘大敗覽遂城葭蘆

紹聖四年

遼壽昌三年

夏天祐民安八年春正月悉兵屯

河外涇原官軍襲沒烟峽破之

夏兵入鄜延右廂種落盡屯河外以爲進取計涇
原帥毛漸使鈐轄王文振乘虛襲破沒烟峽砦斬
三千餘級河外兵回援不及

二月于闐國破瓜沙肅三州

于闐黑汗王阿忽董娥密竭篤使其子詣京師上表言緬藥家作過別無報效已遣兵破夏國瓜沙等三州哲宗詔厚答之

按夏小國也東北鄰塔坦西南接邈川已足牽制兵力茲西有于闐擾其瓜沙諸州國之外患多矣猶不知自保頻擾邊陲其不能得志也宜哉

侵綏德城

夏兵七萬攻綏德鄜延官兵力拒不得逞

閏二月寇麟州敗績首領七人戰歿

梁氏遣兵六萬攻麟州神堂堡甚急都監賈巖以數百騎巡屈野河間道據北欄坡從嶺上馳下奮擊夏衆倉猝首尾不能救近上首領七人皆死餘衆號哭走還

按

兵敗不書所殺之數其書者重詞也夏人屢次犯邊勝負相半麟州之戰賈巖以數百騎破六萬餘衆殺首領七人其功偉矣

三月圍葭蘆城不克退守長波川與河東兵戰敗還
葭蘆城工甫竣梁氏遣兵圍之六日知石州張構
率所部赴援夏兵戰不勝退保長波川據險以待
會河東將折克行率兵入界迎擊被殺者二千餘
人

夏四月令民耕大理河東地

夏國近邊二三百里人戶衆多資糧易集乾順令
蕃部揚言城裏是漢家城外是蕃家常于夜間直
至大理河東葭蘆境上侵耕曠地晝則卻歸本界

經畧使禁之不能止

爭靈平會敗走

知渭州章粦以夏兵猖獗議守涇原之靈平會命
鍾傳與部將苗履統衆城之梁氏遣兵力爭傳將
步騎二萬出不意造河梁濟師作金城關扼其險
要夏兵遂敗

監軍鬼名濟救洪州兵敗洪州失守

靈夏綏銀地多曠土每歲資糧取足于洪宥而二
州羌戶勁勇善戰國中恃爲肘腋自宥州頻經兵

焚城郭殘破知保安軍李沂以兵圍洪州崑名濟
率衆赴援與沂軍戰不勝而走城遂破內外居民
族帳盡被焚毀

環慶官兵破鹽州尋復之

環慶鈐轄張存率兵入夏界至三角川遣銳卒攻
破鹽州俘戮甚衆及還梁氏遣兵追襲存上高原
平少憇夏兵縱火四面攻擊殺蕃官承制趙宗銳
等復取鹽州

集兵駐沒烟峽以爭平夏城不克

葫蘆河據西州形勝章榘擬城之以逼夏國令總
管王文振統熙河秦鳳環慶諸路兵以折可適爲
副陰具版築築城于石門峽好水川之陰控扼韋
州靈夏諸隘梁氏集傾國兵駐沒烟峽設伏以待
可適兵先至失道入伏中死者千人左驥驥使姚
雄率熙河卒七千赴援夏兵據險不戰乘高下瞰
一日得間分頭暴集人各攜草一束鋏鏹一具填
濠而過斷掘城身雄奮勇迎擊流矢注肩戰益厲
夏兵引卻被斬三千餘級俘擄數萬城遂成賜名

平夏

趙挺之崇寧邊畧云太僕寺丞張洵言章蔡在涇原進築平夏靈平蓋合五路之兵夫凡

七十餘萬民有雇夫代役者日直三千自正月至四月而罷所費未可以千億計也夏人素有謀畧皆遠引不出疑若坐困我師乃乘利而出耳與宋史案傳異

五月遣使以宋城要地告于遼

梁氏遣使告于遼曰夏國與南朝歷年交和忽于諸路齊發人馬大行殺掠今則深入近裏地分及于朝廷邊界相近諸要害處多修城壁侵取不息伏望計會南朝卻令還復所奪疆土城砦盡毀所修城壁

左廂首領沒藥內附

沒藥本順寧砦蕃官元祐六年投入夏國官左廂
首領順寧砦巡檢劉延慶遣蕃部均陵陵詐投入
國說令返正沒藥攜所部內投授右侍禁令依元
部坐住

秋七月飢

國中大困民鬻子女于遼國西蕃以爲食

都統軍賀浪囉將兵救宥州大敗

自張蘊兵還梁氏復取宥州卹延經畧使呂惠卿

命諸路出兵討擊熙河將王愍兵抵宥州洪宥韋
三州都統軍賀浪囉率衆赴援愍擊敗之追奔二
十里遂入宥州焚官署倉獄行宮并文籍簿書屯
兵淖河賀浪囉復遣首領移卜淖凌吉訛遇以千
騎邀官軍後與愍等轉戰而南至秦王井爲神臂
弓射卻死者甚衆因退據高原愕視不敢動

八月夏州被圍復遣使如遼乞援

梁氏自七月中點集河南北諸路人馬謀犯鄜延
路白波流諸處都監劉安將兵入界梁氏遣衆禦

于浪沁沙敗績安進薄夏州梁氏令城中謹守復遣使求援于遼言自被南宋侵圖約二十年于諸要害進築城砦不少今歲以來又多修築夏國疆宇日更脧削頻受侵陵乞發大兵援助遼主令涿州牒雄州云西夏本當朝建立兩曾尙主近累使奏告被南朝侵奪地土縱兵殺掠有害和好請追還兵馬毀廢城堡悉歸所侵如尙稽違當遣人別有所議

涿州移牒在十月茲連敘之

彗星見肆赦改明年元

梁氏聚兵將窺涇原以彗星見放散人馬乾順仿
中國制減膳避殿下罪已詔大赦改明年元曰永
安

按上書飢乃大兵之後必有凶年天之示警于
夏也乾順不自脩省聚兵將窺涇原于是又有
彗星之異始罪已肆赦放散兵馬不亦晚乎

九月蕃官妹納僧哥內投

妹納僧哥爲帶牌天使聞中國敕榜招諭遂內奔
授禮賓副使充蘭州部落子巡檢

冬十一月熙秦官軍破白草原抵天都山無所得而回

中國屢行討蕩夏國天都山屬蕃盡將牛羊窖粟預行遠徙時熙河兩路兵四萬出塞將至劉子山監軍司以十萬騎陣白草原拒戰不勝拔營西走兩路軍直入天都監軍司所搜挖無所得軍士糧竭飢死者半乃回

元符元年

遼壽昌四年

夏永安元年春正月鄜延官軍入

界拒之十里并殺順寧砦監押石福

鄭延副總管王愍率諸將由塞門入界大首領凌吉訛遇合洪宥兩監軍兵迎戰不勝退至十里井福與部將賀文密恃勝來追帶金環首領數人皆戰死文密亦重傷福歿于陣

二月犯大定城

大定屬蘭州與夏國分界處梁氏兵屯界上肆行抄掠聞蘭州知州王舜臣兵出金城關乃退還舜臣追至右廂監軍司地夏兵返戰不克帶牌天使數名皆死

三月監軍阿燕率族內投

與其子襄渠及家口人戶約千人阿燕老將多計謀習邊事常出兵寇環慶自中國取安疆砦阿燕懼罪經畧司孫路使人招之遂內附部族聞其降節次投者共二千七百人馬駝牛羊四千餘哲宗特除阿燕宥州刺史充環慶路沿邊兼橫山一帶蕃部都巡檢使賜名懷明襄渠授三班奉職賜名世忠已而蕃部默吹萌山等亦從鄜延涇原路請降默吹補內殿崇班萌山與副兵馬使

附
哲宗實錄元符元年三月癸酉河東路經畧
使奏崇儀使張世永等領兵出界于勝羅沒隴
橫川一帶討蕩斬一千餘級大小首領二十餘
人攷此事宋史不載

夏四月涇原官軍出沒烟峽來攻

涇原兵三次來襲羊馬被掠甚衆至是統制官孫
文將九千騎出沒烟峽直抵屯兵所斬級獲孳畜
而退

大首領嵬名藥默內降

藥默乾順疎族領會州一帶蕃部是時由熙河路
內歸中國令補西頭供奉官兼本族巡檢

監軍鬼名濟入鄜延圍順寧砦

濟圍順寧副將張守德以輕兵邀擊濟退走長城
嶺至赤羊川被斬十二級失馬四十匹時有降羌
潛告師期守德預爲備故濟不得逞

五月鄜延官軍攻夏州大首領鬼名乞勒以兵護大
沙堆不克

沿邊人戶因官軍連次討擊並於大沙堆建柵聚

族自保時卹延路以順寧之圍遣鈐轄苗履統諸將出塞攻夏州梁氏恐官兵焚蕩大沙堆蕃族遣嵬名乞勒那哆陵丁駐兵南面防護苗履揮衆奮擊乞勒等大敗喪失萬計退走五十里

六月梁氏乞兵于遼遼集兵次于境上

乾順屢次乞援遼主但牒雄州令還夏國疆土不肯發兵梁氏乃自爲表請之多怨望語遼主不悅聲言點集人馬應援夏國仍次境上不出

按

書梁氏何志禍始也梁氏以遼主不肯應援

自爲表請致以怨辭逢怒他日鴆毒之禍始于
此矣

蕃部喝强山訛心內奔

二人乃監軍妹勒都逋親隨由涇原入降俱授左
班殿直强山言夏國欲以今秋併兵寇一路不攻
城砦但覓便深入殺掠人戶經畧司以聞

秋七月以兵入涇原

梁氏以中國築沒烟前後兩峽控扼天都形勢于
是編攔人馬出沒隆德砦九羊谷又于榷溝段大

道掘濠作塹縱游騎侵殺邊鋪戍卒守將折可適
同蕃官慕化率兵伺懈出擊方止

掠熙河平西砦

擄熟戶二十餘

八月嵬名濟以兵保青嶺與鄜延將苗履戰敗績

初中國聞強山言謀縱兵討蕩于是王舜臣出熙
河張世永出河東折可適出涇原鄜延遣履護七
將九千騎于是月七日會于柳青平詰旦至青嶺
濟屯兵嶺北拒之履等奮擊濟大敗被殺五百餘

人亡牛羊萬計嶺南北一帶禾稼蹂踐殆盡

九月有星出東井西

如太白狀占者云宮中有憂梁氏聞之惡復謀舉兵

冬十月梁氏復自將攻平夏城潰還

中國自城平夏沿邊諸路相度膏腴相繼進築國人憤曰唱歌作樂地都被漢家占卻後何以堪梁氏謀舉國爭之與乾順計曰平夏視諸壘最大守將郭成最知兵兵法攻其堅則瑕白破于是親將

四十萬衆自沒烟峽疾趨平夏

曾布日錄二十五日夏兵百五十萬

距盩厔砦五十里屯聚旬日乃圍盩厔通峽平夏靈平高平九羊六城砦約三十萬是所攻不止平夏也與宋史諸傳異連營百里建高車日對壘載數百人填

塹而進飛石激火晝夜不息兵士死者數千傷者倍之經十三日城中捍禦有方終不能破糧漸乏一夕大風起西北衝車悉震折衆大潰梁氏慚哭勞面而遁

按

書復將甚詞也梁氏窮兵黷武以一女子常在行間軍中有婦人兵氣爲不揚大風震車戎

衆奔潰有自來矣雖慙哭勢面豈足掩其羞哉
御史中丞仁多楚清舉族內降

楚清官在蕃宰相樞密使下父陵丁死姪保忠代
爲統軍楚清職雖高不得專兵柄嘗請于梁氏不
許心常怏怏時國兵入寇楚清攜家口四十餘人
從間道內投賁生金三百兩並冠服寶玩鞍轡繡
龍帳入獻熙河經畧司視之俱世家物諸羌不及
也哲宗詔赴闕還所獻物授甘州團練使右廂卓
羅一帶都巡檢使

哲宗實錄熙河蘭會路經畧司
言歸附大首領乞加職任詔呂

永信爲甘州國練使涼州一帶蕃部都巡檢鈐轄
妻琳沁哥封會寧郡君男楚清爲西頭供奉奏官
賜名良嗣蘇沁定馬爲供備庫副使卓
囉右廂一帶蕃巡檢與會布日錄異

十一月復遣使乞援于遼

初梁氏圍平夏恐諸路赴援遣駙馬都尉罔囉屯
維薩嶺禦熙河路大首領哱心屯梁榿臺鬼名濟
駐白池禦鄜延秦鳳諸路攻城甫十二日聞熙河
王愍入界斬罔囉鄜延劉安張誠入界敗哱心鬼
名濟等軍中遂無關志及還檢喪人馬二萬餘牛
羊馬馳數萬數百里中族帳蓄積焚毀殆盡國中

奪氣乃遣首領鬼名咩布至遼乞兵猶恐漢兵深入于諸州分掘窖粟點集諸監軍司兵踐踏沿邊食用爲清野計

潛師入涇原犯乾興天聖等砦

梁氏旣解平夏圍人馬仍在涇原近邊盤泊見官軍盡屯葫蘆河知聲勢不相應潛遣精銳入鎮我軍掩至二砦焚掠甫二日間援軍至走回天大雪人馬僵凍過半

十二月統軍鬼名阿埋等復窺平夏被擒餘衆棄天

都山而潰

西壽監軍在柔遠山北阿埋爲六路都統軍與監軍妹勒都通皆桀黠用事稱善戰時以畜牧爲名

自月初

宋史郭成傳夏兵攻平夏成與折可適議乘勢深入以騎異道並進遂俘阿埋都通

二人商氏續綱目冬十月夏人寇平夏城章棣大敗之獲其將嵬名阿埋似屬一事攷棣傳棣擒阿埋

在攻平夏後哲宗紀及夏國傳二事時月亦異

宿兵平夏境欲俟黃河

凍解入犯哲宗詔章棣密圖之棣偵知無備遣郭

成折可適以萬騎異道並進直入其帳執之

曾布日錄

云時爲鄉導者乃妹勒都通部將藥寧懼罪來降故盡知二人所在又偵知其居無兵馬直入臥內

之拾盡俘家屬擄馘三千餘牛羊十萬餘衆駭愕遂

棄天都不守爲可適等所據

章奏奏議云西夏族帳見失此二人接續

扶攜老幼爭來歸降並欲依附二人以居

章奏曰涇原遣師淺攻者

凡四次而三次兵馬所至不過百里西人以爲怯又以爲技止于此故阿埋等安居山林謂漢兵不能深入故得乘其不備擒之蓋亦墮于多方誤之計也

鈐轄吳名革內投

名革見國兵屢敗梁氏點集不已與弟名山及家

口七百九十餘人內奔以所有牌印入獻

按

一歲之中國中內降者踵相接親離衆叛邦國將危梁氏不知保境息民猶恣行黠集宜其禍之速也

月犯東井

犯西扇北第二星太史奏主兵喪梁氏不省

附

宣和遺事二帝北狩道遇綠衣吏飲帝以水且進糧糗曰臣本漢人昔父周忠爲延安鈐轄元符初與夏人戰兵敗父子被擒由是仕于西

夏宣和中西夏出兵助遼爲金人所執授靈州
總管攷是年鄜延兵三入夏界未曾大敗且靈
州屬夏金未嘗取其地何以有總管之設此必
野紀有誤

西夏書事卷三十終

西夏書事卷三十一

青浦 吳廣成西齋 纂

元符二年

遼壽昌五年

夏永安二年春正月河東官軍謀

取西平府拒之于藏才山

嵬名阿埋等至中國獻計請以三萬人取靈州于是河東統制張世永令副將折可大領人馬入界抵藏才山夏兵迎戰可大兵不得進

復因遼使至邸延議事

初夏人至邊每言已干遼國乞和嗣聞遼使蕭彥

昭至中國因遣使如鄜延云欲議事哲宗詔經畧司面諭邊吏如有文字密錄奏報不得擅接但云已申保安軍指揮奏聽朝旨

遼殺夏主母梁氏

乾順年已成立梁氏專恣不許主國事遼主素惡之故請援輒不應及表辭怨慢遣人至國酖殺梁氏命乾順視國政乾順不敢違遣首領哆勿乜賚宥州牒至鄜延稱國母于本月二十日薨已令大使令遜嵬名濟副使謨程田快庸詣闕赴告并附

謝罪表狀令遜謨程皆蕃官名也哲宗命保安軍
卻勿受

按梁氏專政窮兵日與中國爲仇罪誠大矣然
非遼之所得殺也春秋齊人殺哀姜君子非之
况梁氏非姜氏比乾順幸母之死以爲利其尙
有人理哉書曰遼殺夏主母交罪之也

二月爲遼人攻拔思母部

拔思母部遼國西南招討使所轄大安末與達里
底部頻爲遼難殺四捷軍都監特抹等左金吾衛

上將軍蕭阿魯帶擊降之已而復叛遼屢討不悛
命乾順舉兵伐之

大首領唃廝囉遇以兵扼歸漢人于神堆與鄜延將
張誠等戰不勝

乾順以中國并建城砦數遭掩擊部族離散歸漢
者益衆令唃廝囉率數萬衆于神堆及波濟立
魯遜埋諸險要駐營扼之鄜延鈐轄張誠劉安自
星勒泊烏延川襲擊斬四千級降四百餘人唃廝
囉大敗還

南路都統軍嵬名律令遣書熙河請修貢

蕃部嵬名密賁律令書入熙河稱夏國欲再遣使
乞脩貢經畧使孫路上其書哲宗以擅接夏國文
字降路官以書還使者

三月遼遣使爲請和銀州鈐轄令王皆保以兵掠府
州

乾順遣使訃告及修貢俱不納用嵬名濟等謀使
人至遼國請之遼主遣簽書樞密院事蕭德崇禮
部尙書李儼入獻玉帶持書爲夏解和畧曰粵維

夏臺實爲藩輔累承尙主迭受封王近歲以來連表馳奏稱南兵之大舉入西界以深圖懇求救援之師用濟攻伐之難理當依允事貴解和蓋遼之于宋情重祖孫夏之于遼義隆甥舅必欲兩全于保合豈知一失于綏誠而況于彼慶歷元豐中曾有披聞皆爲止退寧謂輒違先旨仍事遠征倘蔽議以無從慮造端而有自則于信誓諒係謀維與其小不忍而窮兵民罹困敝曷若大爲防而善計世享太平特戒使輶敢達誠素哲宗命中書舍人

郭知章持書報曰惟西夏之小邦實本朝之藩輔
曲加封植俾獲安全雖與北嘗有婚姻之親而在
南全居臣子之分含容旣久變詐多端爰自累歲
以來無復事上之禮賜以金繒而不已加之封爵
而愈驕殺掠吏民圍犯城邑推原罪惡在所討除
聊飭邊防預修武備據守要害控扼奔衝輒于去
歲之冬復驅竭國之衆來攻近塞凡涉兩旬自取
死傷數以萬計糧盡力屈衆潰宵歸更爲詭誕之
辭妄求拯救之力狡獪之甚于此可知采聽之餘

固應洞曉必謂深加沮抑乃煩曲爲勸和示以華
緘將之聘幣禮雖形于原意事實異于前聞緬料
雅懷殊非得已顧于信誓殊不相關惟昔與宗致
書仁祖諭協力蕩平之意深同謀外禦之情致欲
全除使無噍類謂有稽于一舉誠無益于兩朝宗
祖貽謀斯爲善矣子孫繼志其可忘諸今者詳味
緝辭有所未諭輒違先旨諒不在茲如克念夫前
徽當益敦乎大信相期固守傳示無窮矧彼夏人
自知困蹙哀祈請命屢叩邊關已戒封疆之臣密

察情僞之狀倘或徒爲空語陰蓄奸謀暫示柔伏
之形終懷窺伺之志則決須討伐難議矜容若果
出至誠深悔前罪所言可信聽命無違卽當徐度
所宜開以自新之路載惟聰聽必諒惻衷使者甫
出境乾順令令王皆保出兵突入府州境殺掠人
民與知州折克行戰被擒

按周氏發明謂是役也遼有恤鄰之誼故續綱
目以書人子之夫夏于遼宋中間屢造兵端然
宋常爲敵而遼時爲援故夏兵勝則遼乘之以

肆要求夏勢衰則遼因之以示排解雖救難恤鄰春秋賢之而遼之此舉則未必然也觀于玉帶之禮方將鈐轄之師旋出不必遼人明知其計已令宋人難以爲情況乎德崇入境遼亦宿兵北道時集賢殿修撰張近知瀛州請出秦甲以伐其謀兩國之狡槩可見矣

附

李氏長編三月丁巳呂惠卿言討蕩西界魯遜埋勒等處脇降蕃戶王固稱係夏衙頭服事小大王王差往宥州統領處使充走馬此事不

見宋史且小大王夏國傳亦無攷

夏四月誅嵬保沒陵結訛遇等遣使入告

初國中用事臣嵬名阿吳死仁多保忠等皆統軍
在外嵬保沒與訛遇日勸梁氏開邊及遣使解和
嵬名濟等勸乾順遣大使嵬名布嚞聿介入告哀
且謝罪哲宗令揜二人入獻卽與收接表章乾順
乃以梁氏死歸罪二人殺之遣蕃部昌哥遇至順
寧砦告其事且云已差大首領慶瑯嵬名科逋磋
邁花結香來計會今國主恭順乞朝廷早賜收接

慶瑯磋邁皆蕃官名也

五月蘭會正鈐轄革瓦孃內附

以所部孳畜及部落子隴登等入降授內殿崇班
賜銀絹錢各三百

毀鄜延路烽臺

經畧司遣兵追不及

六月復遣使賫牒詣鄜延告哀

使人兩至鄜延朝議固卻其表無以示收納意令
保安軍移牒諭之乾順遣首領德明雅逋木攀至

順寧砦但有告哀公牒無謝罪表狀砦主李子明詰問使言舊例先送告哀牒然後差使副賁表狀赴闕子明以與前議不合申經畧司呂惠卿以聞哲宗命再牒宥州諭之

秋七月赤羊川首領賞囉訛乞內投監軍訛勃囉追之敗沒

賞囉訛乞遣所屬納木乞僧報欲歸漢知環州种樸以兵迎之并其家屬百五十餘口孳畜五千會勃囉巡視野砦率千餘騎追擊爲樸所敗勃囉及

首領淚丁訛遇札實等被擒

宋史夏國傳七月環州种樸巡徼赤羊川

獲賞囉訛乞等家屬
孳畜與李氏長編異

八月熙河軍入界首領仁多洗忠被殺

洗忠仁多保忠弟熙河遣硬探人入界

范純粹奏議自种諤

領帥以來許諸將遣發人馬入西界侵掠謂之硬探

洗忠挺身鬪被殺夏衆

出援奪其尸而回

遣衆圍南宗堡

初西蕃阿里骨死其子瞎征殘暴嗜殺部曲離貳

洮州安撫使王瞻率兵取其地瞎征衆潰遂自青

唐入降大酋心牟欽壇與董壇妻契丹公主阿里

骨妻夏國公主

即董壇子
蘭逋比妻

迎董壇疎族溪巴溫入

青唐立木征子攏抄爲主

汪藻青唐錄曾布日錄
俱以攏抄爲溪巴溫次

子與宋
史異

假夏國公主書請援乾順遣兵五千餘人

攻南宗堡王瞻以熙河蕃兵擊之乃退

九月遣使上謝罪表以兵入鎮戎軍殺供奉官陳告
等

宥州移牒云人使未獲赴闕恐有疑阻又諸路脩
築城砦擄掠人口未已乞卽止絕哲宗以前寇熙

河牒詞不遜令卻使進討已有夏國近上首領賞
哆吼報言衙頭密謀若事急則納土北歸遼國矣
朝議未定乾順又令宥州牒言欲以母遺留物入
獻執政謂其不忘恭順乞與收接表狀于是謝罪
使得見于崇政殿上表曰伏念臣國起禍之基由
祖母之世蓋大臣專僭竊之事故中國興弔伐之
師因曠日以尋戈致彌年而造隙尋當冲幼繼襲
弓裘未任國政之繁難又受慈親之裁制始則凶
舅擅其命頓生衅端繼復奸臣固其權妄行兵戰

致貽上怒更用窮征久絕歲幣之常儀頓削祖宗
之故地咎有所屬理尙可伸今母氏薨殂奸人誅
竄故得因馳哀使附上謝章矧惟前咎之所由蒙
睿聰之已察亦或孤臣之是累冀寶慈之垂矜特
納赤誠許脩前約念赦西陲之敝國得反政之初
願追列祖之前猷賜曲全之造俾通常貢獲紹先
盟則質之神靈更無于背德而竭乎忠盡永用于
尊王哲宗賜詔曰省所上表前情具悉爾國久歷
年所屢啟兵端迨爾母氏復聽奸謀擾我疆場毒

及察庶天討有罪業何可容今兇黨殲除爾旣親
事而能抗章引慝冀得自新朕喜爾改圖姑從矜
貸已指揮諸路經畧使令各據巡綽所至明立界
至并約束城砦官兵如西人不來侵犯卽不得出
兵過界爾亦當嚴戒緣邊首領毋得滋擾邊境未
幾乾順遣騎二千餘出浮圖岔犯鎮戎軍陳告與
差使李戴迎戰殺之

閏九月統軍仁多保忠率兵助西蕃圍湟州不克
王瞻擊降攏撈以邈川爲湟州青唐爲鄯州二城

距興靈止二百里南有講珠羅羅二城與湟州北
阿訛城相接羌酋心牟欽德贊羅結聚數千人圍
湟州遣使數輩乞師乾順使保忠及達摩等三監
軍兵十萬助之先斷炳靈寺橋燒星章峽棧道四
面急攻分兵破南宗堡獲守將劉文珪驅至城濠
謂總管王愍曰吾所欲城與地耳第以城歸吾當
捨汝愍謂文珪曰爲吾語夏人天子俾吾守城能
殺我城可得也攻圍十六日愍守益堅保忠令于
南城積薪數萬將焚門會諸將苗履姚雄李忠傑

各率所部赴援戰于青唐峴烟塵亘天夏人不知多少惶遽渡湟水還鈐轄鬼名唃遇被獲

冬十月移牒鄜延請申約束

初宥州牒鄜延請遣使進誓表中國以湟州之役不肯收接回牒詰犯塞之故至是復牒鄜延言已約束首領不得更犯漢界

遣使如遼謝

以中國許和故也

十一月進誓表

乾順遣令能鬼名濟進奉御馬上表謝恩畧曰臣
國不幸時多遇凶兩經母黨之擅權累爲奸人之
竊命頻生邊患頗虧事大之儀增怒上心用張弔
民之伐因削世封之故地又罷歲賜之舊規鮮隙
旣深理訴難達昨幸上天之祐假聖朝之威凶黨
伏誅稚躬反政故得遐馳懇奏陳前咎之所歸乞
紹先盟果淵衷之俯納蒙頒詔而申諭俾貢誓以
輸誠備冒隆恩實增慶躍臣仰符聖諭直陳誓言
願傾一心脩臣職以無怠庶斯百世述貢儀而益

虔飭疆吏永絕爭端誠國人恒遵聖化若違茲約則咎凶再降倘背此盟則基緒非延所有諸路緣邊界至已恭依詔旨施行本國亦于漢界以外側近各安立卓望并砦子去處更其舊行條例并約束事節一依慶歷五年正月二十二日誓詔施行哲宗遣使以銀器衣著各五百疋兩賜之荅詔曰爾以凶黨造謀數干邊吏而能悔過請命祈紹先盟念茲種人亦吾赤子措之安靜乃副朕心嘉爾自新俯從厥志爾無爽約朕不食言所當顯諭國

人永遵信誓除疆界並依已降旨以諸路人馬巡
綽所至立界墩之處爲界兼遡川青唐已係納土
歸順各有舊來界至今來並係漢界及本處部族
有逃叛入夏者卽係漢人并其餘應約束事件一
依慶歷五年正月二十二日誓詔施行自今以後
恩禮恩賜並如舊例

十二月遣使乞賀正旦

先保安軍牒言誓表內誠國人下一字犯眞宗皇
帝廟諱乾順遣使謝罪且乞遵例賀正使人并言

國主效順皆大首領鬼名濟輔導之力今賀正屈期濟勸國主遣使貢奉因誓詔未至不敢遽進

元符三年

遼壽昌六年

夏永安三年春正月西蕃以南宗

堡來附不受

南宗北控夏國南接星章峽西連宗哥城形勢天險自箠羅結叛諸堡殘破及官軍出羌衆潰散諸城咸卽歸順獨南宗負固不下姚雄苗履屢攻不克羌人請附夏國乾順不受惟假兵數百成之秋七月遣使奠慰

初夏使入朝預牒邊臣除館以待及爲境上之議
故爲此去彼來牽制勞苦每違期日吏部侍郎陳
堯叟請戒邊臣如違期不至則勿復應自後不復
敢違是時聞哲宗崩卽遣使入弔并奠慰

八月入賀卽位

使人與遼使蕭穆同見並賜燕加禮而還

冬十月遣使入貢

時中國貶姦臣章惇等使人入見賜賚甚厚

宋史夏國

傳元符三年十月夏遣使賀天寧節攷哲宗紀十月乙未夏人入貢徽宗紀建中靖國元年十月丁

西天寧節羣臣及遼使初上壽于垂拱殿是
是年帝在新喪未行吉禮不可云賀天寧也

十一月請婚于遼

乾順以梁氏之死恐遼國見疑益思自結故以尙
主請遼主不許

宋徽宗建中靖國元年

遼天祚乾
統元年

夏貞觀元年春二

月遼使來告哀

道宗喪也

夏四月遣使如遼奠慰

乾順遣御史中丞蘇愈如遼時與高麗使並至愈

禮節嫺雅館伴耶律德倫特重焉

五月進助山陵

葬欽聖憲肅皇太后欽慈皇太后于永裕陵乾順遣使獻物助工

秋八月始建國學

自曩霄創建蕃學國中由蕃學進者諸州多至數百人而漢學日壞士皆尙氣矜鮮廉恥甘罹文網乾順患之御史中丞薛元禮上言士人之行莫大乎孝廉經國之模莫重於儒學昔元魏開基周齊

繼統無不尊行儒教崇尚詩書蓋西北之遺風不可以立教化也景宗以神武建號製蕃字以爲程文立蕃學以造人士緣時正需才故就其所長以收其用今承平日久而士不興行良由文教不明漢學不重則民樂貪頑之習士無砥礪之心董子所謂不素養士而欲求賢譬猶不琢玉而求文采也可得乎于是乾順命于蕃學外特建國學置教授設弟子員三百立養賢務以廩食之

按夏自元昊制蕃書立蕃學變本而加厲之數

世以來未之改也乾順聽元禮之言建學崇儒
設弟子員以儲人材立養賢務以給廩餼有其
舉之莫敢廢也較諒祚之用漢禮求賜書不更
有進耶

冬十一月遣使如遼賀卽位

天祚嗣位已十月賀使始至館伴傳遼主命責之
恤仁多洗忠家

洗忠戰沒熙河子幼未授職仁多保忠請之乾順
命先以廩祿賜其家

崇寧元年

遼乾統二年

夏貞觀二年春二月與河西軍節

度使趙懷德結婚

懷德卽攏抄中國以羌人久亂王瞻等不能定議

棄鄯湟賜攏抄姓名曰趙懷德授河西軍節度使

其弟邦辟勿丁唄曰懷義同知鄯湟二州事乾順

見西蕃恢復故土重申姻好許以宗室女妻懷德

高永年隴右錄謂梁氏以女妻懷德時梁氏已死錄誤

夏六月復遣使如遼請婚

乾順使殿前太尉李至忠秘書監梁世顯如遼貢

獻請婚遼主問乾順爲人至忠對曰秉性英明處事謹慎守成令主也遼主善其對命徐議之

附

遼史天祚紀乾統二年夏六月壬子李乾順爲宋所攻遣李造福田若水求援攻宋史徽宗紀是年無用兵西夏事

秋八月築沿邊堡砦

國中素少城砦乾順仿中國制于東北沿邊多樹砦柵廊延路以聞朝議舉兵牽制知秦州何常爭之兵不出

冬十月淚丁訛遇自環州還

初訛勃囉被擒以信號與种樸令招其家人及其
所部并論訛遇降訛遇不可囚之土室中三年至
是賂守者得脫還乾順嘉其不屈擢爲監軍使使
守赤羊川

崇寧二年

遼乾統三年

夏貞觀三年春二月建臥佛寺于

甘州

乾順自母梁氏卒輒供佛爲母祈福甘州僧法淨
于故張掖縣西南甘浚山下夜望有光掘之得古

佛三皆臥像也獻于乾順乾順令建寺供之賜額
臥佛

三月羌人圍鄯州河西軍節度使趙懷德請援

羌人多羅巴奉唃廝囉裔溪賒羅撒

宋史吐蕃傳以溪賒羅撒

爲溪巴溫子王厚傳以爲是攏抄弟未知孰是

謀殺懷德以復國舉數萬

衆圍鄯州懷德遣使至夏國請兵乾順遣仁多保
忠帥兵援之兵未至多羅巴三子皆善戰懷德力
不支棄州奔河南

夏五月復乞婚于遼

遼主許之

附

遼史天祚紀乾統三年冬十月庚申夏國復遣使求援攷是時夏與宋尙未交兵不知何以求援宋史夏國傳不載

秋九月封弟察哥爲晉國王

察哥乾順庶弟雄毅多權畧引弓二石餘射洞重甲嘗偕仁多保忠援錢羅結兵敗前迫湟水不得渡察哥持弩拒之一發中苗履副將宋兵退乃免任都統軍鎮衙頭建議言自古行師步騎並利國

家用鐵鶴子以馳騁平原用步跋子以逐險山谷
然一遇陌刀法鐵騎難施若值神臂弓步奚自潰
蓋可以守常不可以禦變也夫兵在審機法貴善
變羌部弓弱矢短技射不精今宜選蕃漢壯勇敢
以強弩兼以標牌平居則帶弓而鋤臨戎則分番
而進以我國之短易中國之長如此則無敵于天
下矣乾順是其策封晉國王使掌兵政

冬十二月入賀正旦

使臣田守義朝賀畢就館燕時中國謀伐夏館伴

呂約試探虛實守義正色曰如君所言豈使臣分
事耶約愧而止